

四庫全書

集部

欽定四庫全書

升菴集卷二十

明 楊慎 撰

五言排律

題赤壁圖

弘治辛酉年十四時作追錄於此

曹瞞下江陵江陵正危劇周郎美少年氣吞江漢窄水  
戰得上流火攻非下策臥龍東略雄烏鵲南飛迫妖氣  
掩黃星倒戈回紫陌鼎足已成形鬼蜮俄褫魄王業聊  
偏安霸圖何赫奕懷哉玉堂仙逝矣黃州客文光貫斗

牛天遊忘遷謫名姓識兒童畫圖燦金碧赤壁幾千秋  
山青江月白

早秋野眺寄所遲客

蟋蟀鳴歲晏爽鳩起涼氛斜川有名飲中林無雜羣輕  
輪逐水曲空舲艤江濱烟杪散靈籟寒漪聚淥文浦思  
帶淫客洲望夷猶君夢想期華月徘徊生碧雲小山桂  
將結幽谷蘭當芬馨香坐消歇足音詎相聞

赤岸山送別效謝靈運

茲山亘長江，合沓氣象分。朱壤凝炎德，光輝灼賴雯。陽  
景有先曉，陰霞遲餘曛。朝暮多奇態，草木含靈氲。既下  
鸞鶴侶，亦來麋鹿羣。石床閤古藓，丹竈流烟漬。遊屐久  
蕪沒，仙跡空塵氛。曰：予敦玄尚，偕子挹清芬。東嶠拾瑤  
草，西岳采香芸。行汎青木水，坐睇峩眉雲。躑躅守甍徑，  
磬欬何當聞。

新正六日隨徐子容郭介甫唐守之登鏡光閣

一首

徐名縉 郭名維 藩唐名皋

抱病強尋春開愁是此辰瑶峯初霽雪鏡水不生塵仙  
閣通青漢皇圖望紫宸城隅纖草出官路遠楊新麗藻  
留金馬煙花對玉人風光知漸好搖蕩曲江濱

至後雪

白雪晃玄陰清都帶玉岑原鱗春盎盎宮雉曉沉沉朔  
氣龍沙遠寒光鴈渚深色裁班女扇聲入楚妃琴黃竹  
當停奏幽蘭且罷吟瑤華如可贈持此慰離心

禁直春寒

太乙祠燈罷甘泉薦鬯回青陽孟月啟華晷上春催溫  
樹花全斂曲池冰不開通明星館迎風寒露臺清冷  
異塵境霄霓隔蓬萊玉女闕窓下金徒抱箭來網戶排  
雲掩瑤墀映雪皚中郎五日直內史三宵陪鄭綿猶重  
御越羅當未裁欲分青藜火共舉淥醪杯

于後江鄉言辭友生

祇命向南瀆離羣感西河英僚篤久要同聲鳴相和廣  
筵開秩秩飛爵引傒傒披雲敷別藻揆日促淹珂晨裝

搖朔易夕駕極岷嶓旋軫陟駭原擊汰凌鴻波流瀾玉  
輪汜杳靄青城阿丹誠薦蘊藻玄韵諧松蘿臨睨目為  
美契闊誰云過遊鱗樂靜渚迅翼懷安柯興彼緬焉情

陳此勞者歌

玉溪云全篇  
不減康樂

別用貞弟

征馬矯西首離琴揚南音懿親將遠別置酒坐華林中  
量豈獨淺強飲不盡斟

玉溪云  
甚情致

分手即岐路千里在寸

陰習習東來風飄飄游子心山川脩且闊羈思壯難任

馳情天一涯結夢江之潯要我清商節聆子吹簫吟

送石熊峯閣老代祀泰山闕里

云亭炎帝館洙泗魯王宮百代聲名遠千秋望秩同郊  
裡元祀啟彤璽九幽通奠玉分宸獻函香領鉅公璣衡  
璇斗北奎壁映天東鯨澤觀滄海鴻逵指岱蒙五松烟  
杪蓋雙檜雨梢叢華袞遺經在金泥故檢空銘崖晴倒  
景文棟曉舒虹仙碣秦觀罷靈旂漢舞終周筵晞湛露  
舜殿轉薰風肅肅攀歸鞅明明翊化工



送尹舜弼祇祀南嶽分韵得王字

洞庭環北渚，衡麓奠南荒。  
軒帝曾張樂，重華舊陟方。  
登封非昔事，秩禮自今王。  
鸞掖馳仙使，龍函捧御香。  
栢梁辭曉宴，桂水泛春航。  
星鳥光芒動，風鳥浩渺揚。  
雲標青磴上，天柱赤霄傍。  
峯影回鴻鴈，岡音下鳳皇。  
搦毫驚拔藻，弭節敬維桑。  
並命還分役，同棲忽異翔。  
行行皆去轍，肅肅戒歸裝。  
南望蒼梧遠，西遊碧草長。  
五津通萬里，七澤繞三湘。  
暑殿螭頭日，秋堂燕子涼。  
漢恩虛講幄，唐會

別文場離索難為久居諸幸不忘

涪江泛舟

明月沉清露秋風起白雲  
蘭橈乘溜急木葉下江聞  
爽籟金懸奏遙峯翠積氛  
碧潭留鴈影錦汭散虹文  
旅望隨天豁幽阿與歲分  
登臨知自好寂寞共誰云

雨宿大寧館

晨櫛充國風夕沐巴嶠雨  
雲館枕攢峯江亭席回許  
空水相澄鮮林霏自吞吐  
天籟坐嘯吟烟蘿共飛舞  
盼淦

感躋踣瞻喬憐滯羽懷哉喜霽吟倦爾愁霖苦稜稜霜  
野鐘紉紉寒譙鼓惜無同懷人凍醪成獨撫

馬山云近

謝靈

運

華清月夕

華清月華滿清都玄景開玉霜竟宇下金波穿雷來鴻  
濛澄寒霧縹垣靜氛埃蓮湯何窈窕松嶺亦崔嵬景滅  
集靈殿聲銷按歌臺繁華自當歇蕪沒誰興哀清光有

今夕欲去重徘徊

馬山云平穩中奇

送彭胡之官保靖

青楓帶楚鄉紅柿引吳航  
溪洞連辰浦峯巒近酉陽  
稻田多有歲橘樹不知霜  
葦簫祈盤瓠鼓祠賽竹郎  
蠻歌花節鼓公讌桂沾漿  
因爾詢風土圖經遠寄將

薰橘

綠橘試新霜金丸綴紫房  
美人憐節物含笑出長廊  
玉手勞親摘朱唇不忍嘗  
濃薰九微火清芬百和香  
捧持青玉案投贈白雲鄉  
桃李終成俗芝蘭豈並芳  
真堪頌

屈子詎許擲潘郎羅帕分珍賜猶疑出上方

詠端溪硯廿韵示兒

瑞石出端溪靈陶琢已齊縑磷開渾沌清越奪琳珪龍  
尾仙翁棹羊肝彥士封浴毫輕似染囚墨膩於鑿舐月  
沉泓北涔雲度岳西影寒歸黑帝光鑑比玄妻羨起圓

如璧紋迴曲似堤藏春留琲璫

初花如玉蓋也俗作落  
舊張有復古編云云

敲日響玻瓈呵潤能欺礎涵星詎照鷲未央無古瓦函  
谷失澄泥兒愛蓮蓬洗奴頑竹節携研山銘可記壺嶺

價應低吮筆漿含蚌祛塵匣斷犀讒邪憂呂望博厚景  
宣尼綺思生松黛訛音辯彩霓寸田豐秬稌勺水躍鯨  
鯢藻翰歌麟趾勲華借兔蹄近將翔沼鳳幸勿厭家雞  
巴嶠薪當荷雄池草正萋玉蟾徵舊夢金馬擬新題

寄袁立山

有美袁州袁無論柳州柳剛方唐介儔文藻坡仙後道  
是三黜餘官仍一麾守雲瑞重輪困山立小培樓賦別  
欲銷魂閱視那容口飛輓疲東征穠蓁廢南畝川滌斤

伐枚水涸星在留竹馬遲細侯銅魚懷杜母行春元有  
脚援溺豈無手橫目良可蘇淵衷期不負汗青垂華勛  
軒冕復何有

戲效西崑體無題十六韻

王御參三粲河圖叙九房天機從此淺華孽竟非祥蟾  
窟那須藥牛津豈服箱周阿生碧樹窈窕限清防翠被  
龍涎透銀箏鹿爪長蕩舟淩浩渺解珮失溟茫南后鳴  
瓊博西施響屨廊山峯歌羯鼓風水舞霓裳繡嶺仙人

閣華清玉女湯笑中迷下蔡粧罷陷平陽回盼傳深意  
橫陳脫薄粧青鸞工渡海赤鳳巧踰牆團扇留明月輕  
裕溼早霜雞皮三復少狐尾九還翔玉井喬家破珠樓  
石氏亡洛神休染翰嗤爾獻之狂

初寒擁爐欣而成詠

閉戶當嚴候圍爐似故人胡桃無賜炭

宋世御炭以胡  
桃文鵲鵲色為

上以賜內  
直學士

楮拙有窮薪兒免號寒喜翁便永夜親焰騰

金菡萏灰聚玉麒麟剪燭休論跋傳杯莫記巡煎茶浮



蟹眼煨芋皺蚪鱗一點那容雪千門預借春霸橋何事  
者凍縮苦吟身

重詠風扇

披襟誇宋玉吹律詫鄒生何似風輪扇能令暑域清  
蘊隆澄沆瀣道暘幻蓬瀛枕簟無三伏樓臺即五城  
郢人忘羽秉宣曲想衣更颺爽蕭丘似飄飄列馭并  
土囊真妄說天籟實多情歌舞宜高晏鮮鮮白紵輕

與張季文偶過虎丘次壁間韵

梵鐘百偈集客枕千念攢同人理舟楫尋僧陟林巒遠  
公邀元亮靈徹訓韋丹且聽柔軟音稍蔚娑娑寒命酒  
對嵇阮言詩偕卜端山阿藏鹿苑江汜臨鴻干篴竹坐  
可嘯英菊飢當餐作繭乃自縛將心與誰安胥任傳說  
靡一笑許歷完王粲詩許歷為完士一言猶敵秦狂思叫北闕幸免尸  
東桓詎期豺虎籍復登雞馬壇從公灑語雪俾余回情

瀾

漢書尹賞傳何所求子死桓東少年場

# 蔬食

蓬樞還老圃，藿食遠膏薌。  
小摘中園裏，薄采南澗傍。  
終葵紫含露，蘘荷白負霜。  
煤作金釵色，齊為玉筍長。  
既飽琅玕腹，亦充沆瀣腸。  
糟井甘三咽，蟻丘愁五漿。  
籠殮詎堪享，鉤餌寧可嘗。  
願言從沮溺，從此謝金張。

送謝子佩

吾愛右溪子，翛然清且真。  
神仙自天骨，吏隱出風塵。  
直道盍當宁，危言動搢紳。  
雷軒三進日，瘴海一麾辰。  
益者來三友，同心得二人。  
歡遊才異域，良會復殊津。  
折坂蹇

烟幕崢峯隱月輪  
遠途折龜背候館密魚鱗  
霄鴈將愁迥露猿  
遞夢頻殷勤祝珍護  
歸及采衣春

詠堠子

邇記軒轅鼓龜升  
夏禹圖兜零清紫塞  
寓望拱皇都水隔生烟  
直山遮落照孤道人春  
振鐸亭長晚吹菰原樹  
遙分薺城荒遠辨蕪淋  
鈴蜀棧雨疲旆楚江  
艫客思虛悲梗吾生  
實射弧驂駢達自達  
兔鹿徑休迂

晨霧

安寧之境杪秋初冬天將晴霽晨必大霧千里一  
白如銀色界須臾日出霞彩暉煥亦奇觀也

玄冥當凜節白霧翳晨朝明月朦朧閣清霜曖曖橋水  
澌工織水花松慣封條嵐市天褰幕煙垆陸湧潮鳬疊  
迷獨釣鹿徑滑歸樵文彩南山豹威稜北塞貂駟星收  
閃閃曦景煥昭昭梅信懸知近憑他酒旆招

升菴集卷二十

欽定四庫全書

集部  
升菴集卷二十一至  
四

詳校官編修臣錢樾

中書臣劉源溥覆勘

總校官原任中允臣王燕緒

校對官學正臣李麐

謄錄監生臣蔣繼勳

欽定四庫全書

升菴集卷二十一

明 楊慎 撰

五言排律

永寧贈任蒼崖

蒼崖金陵彦江陽隱過軸紫羣采靈芝青苑種山穀匪  
直起人疴兼用醫士俗驛綠謝雲達鵠白非日浴石鼎  
彌明詩錦肆君平卜懸鑪圭里遊對榻天池宿綢繆情  
已深繾綣意何篤明當理歸艎候予春渚曲

十月十二日與吳菴蒼崖清會宿平山樓

昨暝江疊泊笑謔極綢繆今夕高樓宿宴醉集朋儔枕  
底靜湍瀨城上聞更籌既傷離索久復念關山脩黃栢  
風人意青艸王孫遊安得騎鴻鵠往來滇海頭

崇聖寺

塵劫非人境烟霞是佛都山開銀色界海涌玉浮圖追  
蠡形猶壯伽藍跡已蕪經函飄粉蠹畫壁剝天吳零雨  
頽牆草驚風廢井梧禪心隨夜寂旅望對秋孤遠目窮



千里傾懷倒百壺狂歌意無極感此歲云徂

無為寺

涼雨敞金天  
暝巒凝紫烟  
復有兔鹿徑  
斜通龍象顛  
餘霞帶飛閣  
流波澄遠川  
危磴三休至  
層臺四望懸  
佳遊惜落景  
愁思怯離弦  
非關興盡返  
良為懷抱牽

春泛昆陽海口

洪池環貝闕  
清籟切龍淵  
光騰馬躍渚  
潤入象耕田  
錦紋浮澹金  
碧映淪連  
津吏醉持楫  
漁郎歌扣舷  
白浪

認前浦丹霞分遠天  
蒙籠山鬼洞遙裔海  
童烟別籟鳴  
空外歸雲望日邊  
向夕長風起愁吟江漢篇

雨夕夢安公石張習之覺而有述因寄

滇越隣天竺  
邛崃隔夜郎  
五離殊畛域  
一別異炎涼  
竄逐他時並  
羈懷此夕長  
歡娛漸迢遞  
晤語落暝茫  
嵐靄炎蒸國  
烟波瘴癘鄉  
秦關生馬角  
蜀嶺斷猿腸  
折坂沉  
黎壁懸繩沫  
若梁南盤堆  
枸醬西毘緝  
枕榔羅漢標  
孤檜觀音映  
遠揚洲街  
龍簇市

土人以辰日為市名龍街

海貨貝投莊

真貨以貝一貝為一莊四莊為一首卉服喧叢薄雕題列大荒逡巡鳥爨

弄鳥爨古之鳥爨今之羅人也其樂謂之爨弄唐世取樂府以為笑云噉咤白狼章白狼樂木

今麗江姚嵩夷也事具漢書霄迴為飛站星低蠱飲光夷人畜蠱夜出飲水有光

如星之曳尾人名曰堀裸風氛甚惡其地不時暴風如嶺南之颶風土人曰堀裸風賦云堀裸揚塵也

茵露毒仍防樹偃申家屋荷凋屈氏裳獨愁吟暄雪九

辨感清商永晝消棋陣流年付酒狂抨弓穿鵠鵠鼓柅

泛螳螂鵠鵠鵠也名螳螂川名康樂吳趨激鍾儀楚奏傷盼歸頻

握桴憶舊幾停觴夙昔交遊日崢嶸翰墨場金蘭通氣

味桑梓借徽芳健筆誇鸚武靈陶憂鳳皇執鞭從李杜  
傾蓋許班揚賈誼三書切相如四賦良軼塵追騷裏缺  
岸倚躊躇百斛扛文鼎千帆掣駛檣仙才輕綬冕公望  
重珪璋蒲席青規地薇垣紫界牆璇閨高曳履瓊蕊儼  
分行笏捧綈囊奏衣飄畫省香輦花簪蟲蟲池艸佩鏘  
鏘傑直承明下經過韋曲傍翠微橫半岫白水溢方塘  
暝宿招提境雲眠蒼蔚房樵歌塞薜荔漁影照滄浪倏  
忽嗟岐路參差散頡頏薰華晨逗雨冥英曉凌霜拂鬱

干將劍聯翻戍客裝峨眉臨絕頂瀼水宛中央  
越蔭江楓赤庭蕪塞葉黃閉門非泄柳畏壘詎庚桑  
紛緒琴心懶衰顏鏡匣藏屏居親猗猗坐嘯和蛩螢  
張敏情還劇安期好不忘形骸元脫畧身世且徜徉  
蜎壤甘怡鵠鴻冥豈慕梁艱虞寧暇問吾道任蒼蒼

孟夏苦雨不絕

積雨千家靜停雲八表昏青苔封甲子白水漏乾坤  
祇益黔巫瘴虛沾屏翳恩愁零詩欲繼繁露術空存  
潮沒

宵通井津梁曉隔門何時集車馬明月對琴樽

秋夕效六朝體

美人別我去春恨滿靡蕪况是新秋夕相思芳歲徂月  
纖京兆畫星點漢臯珠峯霞張錦頰池澈湛清臚物色  
那堪對情悰可忍孤將懷結楚夢流思向雲巫

贈汪泉翁

西土滇雲鎮南天執法星尚書崇禹衛大雅重周屏聖  
化彰無外皇心佇靡寧分弓紹質繡掛劍倚潭青吉日

占風角山門背斗刑威聲先象渚敵愾到麓冷玉帳通  
降表金標已勒銘風馳凌汴掃火急驗灰釘春壤重看  
闕宵關遂不扃帝圖興外拓王畧殂邊經勛業今昭鼎  
文章舊發硯調高清瑟倡名並色絲馨芳潤三霄露濤  
瀾六月溟過都誇驪褭傾國掩娥姪谷響丁丁木波縈  
泛泛萍儀尊出城郭暢轂駐山亭墨許池中洗歌容澤  
畔聽真堪慰遲暮渾欲忘飄零信宿慙鴻渚生涯老鶴  
汀陳雷千古誼一羽在仙冥

訓張子上臥疾

幽憂子伏枕寂寥予閉關誰言彈丸地若阻重甌山朱  
羲陸將改清商節欲還幕庭書帶靜文波屏風閒鳴瓊  
罷魚翕窺棋忘豹斑牽率訓蘭藻俯仰企芝顏

答彭子冲

異縣悲南國同車感北風霜清淮浦濶木落楚江空危  
坂難迴馬炎方少去鴻望歸天共遠惜別歲將窮海曲  
飛鳴隔山梁飲啄同從軍古云樂况復九夷通



送周子顓工部北還

潘岳賦西征江淹黯別情羊腸縈隴坂龍角繞吳城晚  
照澄江靜星浮洞浦清石帆風外矗沙鏡雨中明愁聽  
丹楓落勞歌白芷生杪秋遙夕夢殘月半長庚

五月四日蔡龜崖太守邀會於三塔寺大觀堂

分題得櫺檻觀瀾分韵得霧字

蔡名紹科

青冥鳥外簷翠靄雲中路暇日從公遊淑景同人聚  
幘幙捲宿氛晏溫屬新昀陶潛思停雲樂廣欣披霧空侯

睇遙天

佛經有此語

平薺數津樹陽焰展海幘浮圖象天柱

繡檻狎鷗汀朱窓見魚步鷺翻入鏡明灘羽當屏度酌  
言深竿酣詎覺層城暮懸火已促歸芳草猶回顧慙賡  
玄暉吟緬誦澄江句

六里菁

在豐祿

六里菁何深千章樹如薺俯聽秋蟬鳴翻在幽澗底澗  
水何湔湔谷蘭香靡靡不見采芳人誰為枕流子日暮  
心悠哉臨風聊徙倚

溫泉

神丘隱雲岵靈源渺天河陰火煮玉泉陽暈漱朱波吹  
律豈鄒子煉石疑媧娥乳竇沉水碧碕梁起盤渦漸漸  
不濡軌汨汨常盈科偕賞玩仙液蘊真洗人病浴蘭興  
遠思沐芳咏遺歌銅池漢雷側釦城驪山阿朝宗阻江  
漢褰裳限群犴天隅感流落日暮吟蹉跎

明月子

桂影靜遙天照我綺窻前窻中出佳麗樓上鬪嬋娟三

五嫦娥夕二八箇儂年金波未成鏡玉弓才引弦月隨  
人共媚人與月相憐自有橫陳意流光燭錦筵

送周子籲北上

天路還鄉路文星即使星北溟觀浩渺南紀歷岵亭博  
望傳節節王褒識碧形漢詩陳奕奕楚賦詠革革揆藻  
留仙署分華到旅庭薰筵風若蕙浴楫日如萍玄草揚  
雲閣青蘋柳憚汀良書睽暝榻張飲列春垌鳳舉誠難  
駐驪歌忍易聽吳宮有歸乙飛札冀丁寧

池上會心亭初成與客小飲

故鄉歸未得暇日且銷憂仙地那能縮吾廬亦自幽垂  
楊覆鍛沼脩竹引觴流桂白淮山晚梨紅張谷秋烟林  
平似織雲樹鬱如浮即此堪招隱無勞賦遠遊

送劉少隣北上

春物茂華滋花宮攜手時行行傷遠別恨恨不能辭歲  
月甘衰矣山川若間之嘉遊才舊約良宴即生離南浦  
江淹賦北梁蘇武詩拏音悽去柰行色慘征旗濁酒臨

風把清塵何日追惟應托宵夢萬里逐心知

贈簡西岳

才藻婉劉珊經術擬杜環鴻儀渾物外馬跡徧人間  
硯沼三江狹詩囊五岳慳好吞雲夢澤莫擘少華山  
喜枉  
魁颯徑慵攀虎豹關繫維過信宿瓊玖照衰顏

四月八日觀李中溪

元陽

浴佛會

三花寶樹下八水香池邊驚嶺玄宗啟魚山清梵傳日  
華明震旦雲彩麗諸天染衣豈尊宿鏗佩盡儒仙虛界

一郡剎實際萬由延伊子漂戎旅同君登法船

春郊觀射戴玉案葉雨湖錢憲副劉民部同賦  
東郊春草合襟英紛滿林同聲有勝集興言相追尋  
白羽晝搖月鳴骹風遞音已負投筆志曾是懸弧心  
射雉休重賦蜚鴻聊一吟

清宵有清光

清宵有清光虛堂更窈窕月戶自娟娟  
風枝何嫋嫋樓迴寒更遞堞近飛鳥繞  
露氣潤層簾星光涵碧沼美人

阻風期幽懷寄天表瓊想去翼長寶刻來音杳索居能  
無言歲月成遐邈

雲中十二韻

天子雲中狩將軍久未還律吹玄菟塞旗繞白狼山風  
火燒荒急星辰過隊閒燕支留馬首蘇酪醉龍顏清樂  
千門動黃金萬鎰頌雪深懷纒絮月滿憶刀鐮牙烏嚴  
宵仗宮鴉捲曉班奏回青瑣闥捷報紫金關督力休明  
鎧歡聲洽禁闌功牌銀燦燦賀障錦編欄日轉虞巡外



春流鎬安間戢戈行有頌神武徧人寰

首夏過西園得樂字

青雲何飄飄華彩遠揮霍阿閣翼景龍出臯伴鳴鶴信  
宿訪烟霞夙尚本丘壑赫曦中陸永夏氣南榮薄游樹  
列丰茸行欄護花藥還近竹林遊遂動蘭池作甘瓜浮  
清泉碧盃凍寒酪芰製鳬鷺親林籟宮商錯妙理寄沉  
寔興懷在歌嘏悠然莊舄心試誦思歸樂

升菴集卷二十一

欽定四庫全書

升菴集卷二十二

明 楊慎 撰

五言排律

八月二日經筵紀事

經帷當日表講殿直天中鵷鷺隨多士貂蟬列上公  
墀聲分噦噦櫺影辨瞳瞳湛露晞蘭省卿雲爛桂宮  
蟻浮仙酒綠鶴翫錫袍紅晉晝延三接堯旻達四聰  
衣香芬玉藻履跡印璇穹觀易三陽泰陳詩萬國同  
寵高梁授

簡思邁漢臨雍奎聚占乾象研書識帝鴻羽陵無蝕蠹  
玄閣謝琬蟲瑩德同金礪溫規借玉攻宸瞻休氣近鍾  
叩德音隆卷帙叨從事簪裾儼在躬消塵何補助海岳  
自深崇敢詫桓榮力還歌吉甫風

與方思道別

子有東山行訪予東城曲承風動別颺揆景淹離旭青  
翰下新波驪駒遵往陸贈言已結紉晤語猶更僕風淝  
宣宮商郁郁披華縟煌煌京洛都濟濟英賢躅端居促

席輕分岐馳念駕芝蘭在久要丹腹失相勗幸駛星駕  
期共玩春芳綠

園池春晚圖

方塘含廣漪名園饒雜英花蟲丰茸戲水鳥間關鳴啁  
啾既萬態藿靡又千名錦純奪艷色笙簧無雅聲聲色  
知可翫冶遊空復情青雲從東駛白日向西傾還思玄  
洲路遠訪丹丘生

首夏郊觀得者字

端居臨囂塵良辰睠林野聯翩接華裾邂逅命金馬玉  
堂凌炎歊琪園敞瀟洒丹葩駐餘春清陰澄首夏烟絲  
困欲扶風絮情猶惹羽翼涼颺浮塵尾玄韻瀉山陰茅  
宇期水曲蘭亭筆青雲興何高白雪和彌寡列子風馭  
還襄童日車下回首汗漫游愧爾悠然者

夏日登毘盧閣

赫曦改東陸鮮飈轉南薰炎歊深城府清泠阻江濱隱  
几倦文竹紉書厭香芸眷言承明侶肅此塵外羣仙梯

駕虹出梵閣排霞分攀楹低白日對檻俯朱雲圓方鵲  
舉見參差鸞歌聞意樹鳴天籟禪枝繞烟芬斜景斂平  
靄飛雨洒高甍金壘引清酌玉塵生涼氛興謠吐雲藻  
搖筆揮風斤香留荀令榻書染羊欣帚奇賞真四美同  
詠慙五君

箕山王氏亭子

華館敞清虛蘭塘帶碧渠山雲迎下榻海月入前除席  
對仙人宴門回長者車林喧沽酒鳥水躍聽琴魚六馬

將軍畫雙鸞內史書天遊脫羈馮野服謝簪裾策杖歌  
招隱披襟誦卜居菟裘名勝地真作偃佺廬

送江景熙

西陸戒嚴雨東溟理仙艫征帆搖孟渚行闕動吳歛山  
川成異地岐路感分衢雲中翔乘鴈汀際隱雙鳬林楓  
夕響振籬牆霜艷敷蹉跎良遊阻荏芳節徂晨風方  
發發晚露已塗塗行矣曠音息因之重踟蹰

安公石館賞並蒂蓮得井字



何處同心花移根七仙井日彩曜聯華風漪漾雙影金  
塘宛虹欹翠益沉霞靜已近交疏窓復接參差荇露飲  
對壁人涼颺失炎景南遊遲采芳相思歲將冷

送許稚仁得玉字

之子蘊英猷夙齡在仙錄峯苑采璿琤天閑得驊騮曳  
裾青瑣闥焚草明光燭止戈義驟陳諫獵書曾讀虎旅  
昔屯邅龍鱗幾嬰觸邇載逢休明沍寒回氤煊羽儀遂  
高鶩離照開四牖坐見皇風移歟受恩波浴厭直下承

明經略盡郊鄜露網馳文軒金銬耀朱褱  
謂嚶鳴羣翻成驪駒曲回腸繞車輪睽目謬  
丹綠祖席臨折梅勞歌聽采菱笛響引飛鴻  
絃音催別鵠分曹理毫素同聲覆杯醕霽宇  
澄皎靈陽林淨齡旭煙霜異節驚山川別岐  
促良會將無踈思君如美玉

聖泉篇贈韓石溪

龍圖天生水義畫山出泉睠茲感沸流肇彼渾  
沌年盈涸在頃刻消息同坤乾塵刹變朝夕億  
垓無貿遷帝臺

盎漿及神瀝壺嶺顛冰雪姑射質風露綽約仙竇雲騰  
滴滴泓月涵娟娟蝦鬚穿皎鏡蟹眼瞭淪連岷觴衍遊  
聖坳舟喻思玄迷蹤鬼方霧縕真羅句烟詎逢陸羽品  
那遇桑欽傳名公紆勝引嘉招陶芳筵折簡開薈蔚飛  
觥延霽天玉珂裊重巘金艾明華田碧澈灑柔翰翠微  
鏗洞絃臨源稱混混倚谷望瑤瑤嚴闥鑿鼓動迴谿黃  
燭然荒塗欣良會興言遂成篇

立春詠瓶梅

新春見早梅先折一枝來不待并刀剪何須羯鼓催年  
先掌上出春色鬢邊回影浸金瓶水香留玉鏡臺精神  
憐粉素零落惜瓊瑰情惹陽雲夢歌成郢雪才佳人知  
愛重摘取泛霜盃

建林驛垂柳

枝枝金縷細葉葉翠條輕嫋嫋曾經折陰陰已復成流  
鶯頻喚曲征騎此重行不為芳菲惜多緣歲月驚烟條  
縈水曲風絮惹山城閨怨佳人笛邊愁大將營婆娑漢

南意因見古人情

送周子庚

金都憲撫邊

肅肅戒嚴程蕭蕭班馬鳴  
龍庭新節制騎省舊才名  
玉律調秋氣金鐃寢夜聲  
隴雲笳外結關月笛中明  
鸞朔臨秦障鶉觚繞漢城  
沙汀行見鴈海樹坐聞鶯  
遊霧懷前賞歸風遡別情  
佇聽歌凱入一舉塞垣清

送童士疇

承緒冊封河南

西候臨周道南溟望楚雲  
恩綸三殿出瑞節五潢分  
瞻

洛詩先誦遊梁賦早聞神臯添藻思仙苑挹蘭芬池遠  
鳳皇影江連鴻鴈羣歸程應計日陌上草初薰

南館對雪

玄霜有端木玉葉凌雲裁人間驚未見天上還先開斜  
飄涼風館平覆露寒臺牆陰明紫界城隅淨丹埃象廊  
光掩映驚披舞徘徊飛翼繞繞雷積霰忽成堆三素基  
邊瑩六花衣上來東閣觀梅興南宮視草才熏爐馥朝  
樸仙醞盈春壘書停柱下筆歌待郢中催

小春紅梅效徐庾體

風池冰未合雲林葉才彫小梅含紫萼疎英綴青條飄  
香寒谷迴靜影月林遙絳雪明玄夜丹霞凝素朝美人  
惜瓊樹纖手撫金翹剪彩添花蕊橫枝當綺寮春杯酌  
鸚鵡夕幌啟鮫綃鮮粧呈粉艷醉頰湧紅潮百和爐烟  
歇九枝燈焰消窓通羅浮夢簾隔壽陽嬌笛奏金將落  
琴心弄未調芳華誰與問秀色自孤標

賦得流風迴雪

春雲籠半晴春雪太多情神飈起玄朔仙靈飄紫清軒  
墀颺以徧房櫳暖有聲宛轉逗香徑玲瓏穿綺楹稍訝  
銅池淨俄看釳砌平沾梅粉臆動染柳翠稊驚絃歌隨  
綽約巾舞闕輕盈借問凌波浦何如不夜城

羊皮彩燈屏

鴈足懸秦殿鯨膏朗魏宮何似靈獬獬揚輝玄夜中百  
琲添絢爛七采闕玲瓏洛洞金光徹

異苑洛洞穴中金寶交飾明奪三光

中有神羊居之

東岳玉華融

易是類謀東岳亡玉羊劉孝綽詩玉羊東岳上金虎西方出

雪



毫羞曜日雲母詎障風白石望如近素絲看若空青精

千歲樹丹影五仙虹餘明如不息還持繼燭龍

張禹山曰凡詠

物詩不工則泛太工則弱此詩咏物極工而體句在古樂府中表表獨步

春郊得紫字張惟信同賦

韶景臨上春年華屬元巳晉禊首洛濱鄭風詠溱洧  
川盈蕙蘭芳蹊蔭桃李宛宛流文鶯班班聒澤雉園翹  
豐綠莢水葉牽玄沚百琲佳麗人千金遊冶子飛蓋雜  
英前行筵芳樹底廣幕耀周緹袷服矜齊紫野隰被華

丹林籟和宮徵徙倚非送歸躊躇因望美陌上君馬飢  
閨中妾蠶起晴絲颺鳴鞘香塵翼還軌冲虛情已遺沉  
痾酒仍止請從張茂先清言洞名理

首夏送東城邵園餞彭子克給諫得送字

遲遲東谷移習習南薰動暄樹語綿蠻晴嵐收蝦蟆美  
人獨搖裝良儔遠相送城隅敞行筵陌塵靜飛鞚漸臺  
高白虎梓澤隣金鳳掛衣女蘿谿展席仙霞洞香影散  
清陰雲液流春瓮鷄首且沿洄驪駒太倥偬竹枝巴渝

聲桃葉江南弄明發聽晨鐘悠悠隔江夢

補范石湖占陰晴諺

朝霞不出市暮霞走千里日早雨淋腦日晏鴈晒翅天

道管難窺農談綽有理星占溼土時

諺云乾星照溼土明日依舊雨

月

驗仰瓦比

諺云月如仰瓦不求自下月如彎弓少雨多風

朔朔雞上籠

雞上籠早主雨

趯趯魚秤水

魚跳出水主水漲

雲起樓梯天

諺云樓梯天晒破磚

日沒燕

脂紫

諺云日沒燕脂紅無雨也有風

電光分南北陰霽在俄晷

諺云南

北閃虹為水椿兒

虹主晴亦主雨明而長者主晴短而暗者俗呼水椿兒主雨

霧是

山巾子

諺云山頭戴黑猪渡斜漢

謂之野猪渡

夜視天河中有黑雲

雨蕭水崖詩黑猪渡河天不風蒼龍銜燭不敢紅

金烏抱雙珥

日抱耳主雨

聒聒卜

蛙鳴疆疆占鵲喜戴帽視泡文

雨點有泡謂之戴帽主雨

著裙看窺

底窺

下有濕痕曰水缸穿裙主雨

金星驗雜出燈花結雙槩昕夕恒目

擊雨暘如掌指方朔廢射覆洛閎休厯紀先哲有格言

林臥觀無始

補杜子美哀張九齡詩

相國生南紀蔚為曲江彥山接韶音峯秀鍾重華旬風

雅既歲黜聲名鬱蔥倩登庸伊呂科敷奏姚宋羨珠澤  
隨侯雙玉林邾詵片九重集神仙咫尺生顧盼陸謝擅  
緣情沈范采餘絢九遷帝獨奇三臺師錫薦補袞綴宗  
彝用藥必瞑眩防乎貴未然介焉斷幾見狐媚蕩主心  
狼子紆皇眷金鏡倏垢塵玉弩驚腥啓萋斐偃月堂棄  
捐秋風扇鼉動漁陽顰蟲飛太極箭朱鸞奔咸京青驪  
乘蜀傳棧閣雨林鈴宛洛颺迴縣蜚鴈愁仰霄昆蹄怯  
升甌噬臍漫天泣回腸嶺南莫精已箕尾騎鳧猶螭頭

戀絕綫國步危規填忠言賤青史篆崢嶸翠珉藤獸蔓  
誰珍徐孺碑彫蟲但黃絹

劉須溪云九齡大節在奏請斬祿山以絕後患杜  
公八哀詩既不明白末亦不及另祭事殆失詩史  
未免拾其細而遺其大也慎輒為補一篇豈敢以  
厖涼鬪華衮鉏刃齒步光哉亦續須溪之餘蘊發  
曲江之幽光觀者勿哂之

升菴集卷二十二

欽定四庫全書

升菴集卷二十三

明 楊慎 撰

七言古詩

送李元白侍御巡茶馬

漢家六郡防秋野秦地長城限諸夏單于自款幕南庭  
天子非貪大宛馬柱史東臺獬豸冠霜威北塞斗牛寒  
銜青驃騎尋常足充國屯田什一寬隴頭流水停鳴咽  
朔吹先春飄惠澤好繼周書王會圖休翻樂府關山月

紫杉行

雉雞斑文孔雀尾紫杉載月八千里越舲楚舵相並行  
半入明湖半蘄水人生醜好無百年束縛亦得歸黃泉  
此物何用一百片水鬼揶揄風浪顛

養龍坑飛越峯天馬歌

高皇御天開大明龍馬出自養龍坑房星夜下鹿盧寨  
天駟曉來驃騎營殿前重瞳回顧盼奚官仗外爭相迎  
雞鳴牛首試控縱鳳師麟儀無逸驚歸風絕塵羨迅疾



逮日先影羞翮輕四蹄翩然不蹶地六飛如在空中行  
是時雄酋有奢香左驂牡驪右牝黃貢上金陵一萬匹  
內殿惟稱此馬良宸遊清燕幸鸞坡學士承旨讚且歌  
飲以蘭池之瑤水秣以芝田之玉禾飛越峯名自天錫  
駿骨雖朽名不磨至今百七十歲時山頭猶有養龍池  
方經地志或遺漏箐苗洞獠那能知吾聞天下有道飛  
黃伏皂又聞王良策馬車騎滿野前時吉囊寇大同烽  
火直達甘泉宮近日莫瀛亂交趾羽書牙璋偏南中安

得將星再降傅友德房宿重孕飛越峯一月三捷獻俘  
馘千旄萬旗歌熙雍嗚呼將相寧有種龍駒豈無媒經  
途訪跡一興慨郭隗孫陽安在哉長歌終曲長風來

題夏仲昭竹寄陶良相

驥

大常胸次瀟湘寬少年愛寫生琅玕白頭藝苑更入妙  
筆法遠追王孟端兩家名藻雄吳下品題未覺風流亞  
一紙能令百世傳兩竿不啻雙金價人言畫竹非畫工  
草書結構將無同誰家高堂名寶繪徐熙花鳥迷青紅

玉人佳興松江東寄圖索賦隨長風遙知把玩清香裏  
正是相思明月中

擊壤圖

陶唐天子調八風鳳儀獸舞明廷中誰知鼓腹行歌者  
復有山中擊壤翁短袖單衣露兩肘野狀村容不自醜  
掀髯笑傲肩相隨共道帝力我何有柳谷餞日暘谷賓  
老翁那記昏與晨一作一息有出入時耕時鑿無冬春  
莫英開殘又朱草生來未識平陽道海隅赤日燒九州

寰中息壤汨洪流已見天戈揮丹浦更聞風伯殪青丘  
老翁其間百不憂直從紅顏到白頭君不見許由逃堯  
勞步履巢父洗耳污清泚華封老人費言辭康衢小兒  
強解事姑射丰姿雖可珍神仙彷彿信難真君看擊壤  
千年後多少行歌帶索人

離席行送彭一

幸菴尚書之弟

昔子從軍巴蜀山橫戈千里何間關坐使麒麟日月煥  
行收魚鳥風雲間文武才名歸一姓兄弟勲華許誰並

起晚已謝時運傾當陽再睹乾坤正陟岡在原來復返  
海水天風歲將晚行行白馬燕雪深飛飛黃鵠秦雲遠  
離堂命酒羽觴疾畢昂盈軒月東出主人留連客離席  
慷慨為子歌今夕

### 海風行

下關臨蒼海點蒼之衝有石梁曰天橋口歲恒風  
烈偃樹走石人馬辟易予夕憩客郵聞吼聲傍枕  
發眎尤雄明適過之纖蘿不動乃賦以志之

蒼山峽束滄江口天梁中貫晴雷吼中有不斷之長風  
衝波動林沙石走咫尺顛崖迫不分征馬長嘶客低首  
我行其野歲仲春春寒野陰雲物屯病骨凌兢坐自躓  
欲去未到先愁人山靈相假若有神纖蘿不動停颺塵  
烏鳥聲樂旅顏破僕夫笑語龐眉伸翻思往昔蘭臺直  
披襟曾奮雌雄筆金門玉堂遠別來景差唐勒長相憶  
飄蓬落羽向南荒憔悴榮華寧有常不學回風悲屈子  
江邊愁結芰荷裳

新開嶺行

廢丘關前榛莽積新開嶺上烟嵐闢新途  
古道太多岐  
暝色荒烟帶征客岸下寒江流水碧  
崖畔霜林楓葉赤  
日暮畏行豺虎陌松燈菰火投孤驛  
北渚鳴鼉應遠更  
南嶽哀猿響終夕

玉溪云棧閣夜行方識此景

奇景行畢節早行作

晴嵐空濛幕朝彩頓看色界澄飛靄白雲翻在半山腰  
下窺深箐如銀海須臾赤日上青林銀海鎔為紫磨金

窮岫瘁鄉那有此天教奇景換豪吟

苔磯費生畫屏歌

往年嘗愛岑公詩吾觀費子毛骨奇  
婉孌總角突而弁粉繪風流今在茲  
素屏八幅君能畫咫尺江陽影仙界  
寶山春眺在蒼茫海觀秋瀾湧澎湃  
龍潭時雨稻苗齊霽雪方山勝剡溪  
白塔朝霞紅散綺東崖夜月明如珪  
荔子丹芳錦林麗餘甘客舫無留滯  
避喧可當武陵桃招隱還同小山桂  
乘興何須慕遠遊山中日月自悠悠



君不見眉山蕭旭亦好手流落滇南今白頭

琵琶短引

唐池南席上作

漢宮佳麗呼韓婦黃金捍撥春風手鵷鳳宜承馭娑恩  
夫羊翻作穹廬偶行行北斗望南看馬上一聲堪白首  
茫茫烟草叫胡笳漠漠塵沙雜刀斗塞垣三秋少鴈鴻  
幕庭四月無花柳楓香絕調今共憐薰英幽恨君知否  
遺譜誰將異代傳艷辭自出騷人口賀段本領昔已荒  
穆曹宮調知何有定子新從北里來

杜牧之事

管兒不是東

塙樓

元微之事

華表工彫犀四稜錦條自結絲千縷

琵琶四軸名華

表兩孔名迴窓見顧凱之賦

撚絃運軫翠蚪盤促過急節朱鸞走輪

袍古引連瑣新驚颿截浪忽雷吼曲終賺尾復重頭掩  
却瓶笙兼瓦缶良夜邀歡松炬難主翁愛客江魚剖善  
謔欣逢宋魏三知音况對唐元九飽諳世事反覆多甘  
向天涯淪落久船中肯濕馬曹衫樽前且進牛父酒

射虎圖為箬溪都憲題

錢選好手工白描粉墨丹青色沮喪細觀逸跡迥不俗

氣骨深穩形蕭放中丞此圖開似我行行遊獵極殊狀  
漢家昔日李將軍生射猛獸天下聞彎弓半夜沒白羽  
飛鞚晴晝生黃雲今之圖畫無乃是披卷似覺陰風起  
積雪慘淡長白山草木蒼乾松漠間將軍身乘大宛馬  
從騎亦是驍雄者合圍射虎虎帶箭相持不肯遽相下  
虎鬪馬驟兩若飛咆吼欲震長平瓦東海黃公魯卞莊  
裴旻舞劍相頡頏古來英英者數子繪事簡冊傳芬芳  
何物少陵愁杜甫短衣南山思射虎老驥伏櫪悲鳴苦

壯士哀歌淚如雨天狼煌芒直威弧安得此輩踰飛狐  
却走馬蹄報神都為獻單于款塞圖

臥月引為錢節夫賦

昆明池上逢錢郎青雲為衣白霓裳手持寶月金仙偈  
口誦明星玉女章自言五華峯頭住夢遊玄圃樊桐路  
御風學霧雨無心惟愛月華籠海樹少年名姓懸月中  
老去猶充修月戶月裏仙人宋無忌持斧吳剛作仙使  
下界愛月升高丘步虛一聲龍白頭何如放舟臥明月

仰看銀河天倒流乘鸞翳鳳過北斗炤景煌煌酌天酒  
玉兔為脯桂作薪笑携吳宋兩仙人老蟾踏翻醉不醒  
嫦娥起舞榆花春

石雲寺見山茶梅憶愈光

江梅山茶早爭新點蒼逢春憶滇春金碧同遊似昨日  
紅素兩芳如故人此山見花還載酒醉歌激越喧林藪  
莫看華鬢驚客心且喜風光入吾手

寄張季文

美人別我歲幾華  
碧草五見生天涯  
東風東來飄錦字  
忽如青天披雲霞  
往年君向秣陵去  
海夢橫分漂陽樹  
今年君自滇池還  
風光又隔點蒼山  
佳期不得同攜手  
惆悵令人青鬢斑

賦得靈巖閣送余懋賢

名承業

青衣江水青楓林  
靈巖樓閣冠靈岑  
鯨音曉徹三峯靜  
漁唱宵連五渡深  
三峯五渡招提景  
雙林八水氛埃屏  
花雨諸天白壁雲  
松風六月丹崖冷  
丹崖白壁上清虛

石竇雲龕縹渺居玄度每過支遁室陶潛常醉遠公廬  
予別靈巖歲初改早見聲儀動江海仙舟玉節下清泠  
烟巒霞嶼生光彩巖前落木秋紛紛樓下澄江靜練紋  
登臨定擬湯休作好寄新題向碧雲

升菴集卷二十三



欽定四庫全書

升菴集卷二十四

明 楊慎 撰

七言古詩

提學陳西漁品士亭歌

君侯品士如品竹品士亭臯森種玉擬占易象玩蒼筤  
逝將詩興歌淇澳洊雷半夜籜龍驚嶰谷先春紫脫生  
脩纖一一如人立節足聲聲學鳳鳴伶倫律管迷宮徵  
千載元聲元不死文章迴出珊瑚枝簫韶猶在瀟湘水

黑頭心期汗青日獨騎魯麟續魯筆禮樂攻吾化雨滂  
藻彞繪帝卿雲密赤闌西面最宜秋靈籟沉沉顥氣浮  
手中九苞屬天匠眼前萬物供冥搜江湖那容閒袖手  
三山六鼇亦何有只今赤管輝金章豈數當年靳許昌  
甘露竹花何漠漠此地容無此亭著乾坤光燄燭滇隴  
早晚勛華上阿閣

錦津舟中對酒別劉善充

錦江烟水星橋渡惜別愁攀江上樹青青楊柳故鄉遙

渺渺征人大荒去蘇武匈奴十九年誰傳書札上林邊  
北風胡馬南枝鳥腸斷當筵蜀國絃

贈韓飛霞

往年見君黎州城荒林明月尾虎行凸杯百罰醪醕酒  
么絃四犯玲瓏聲十六年來若反手天涯白髮遞相驚  
君今結舫漁磯宿愁霖我住癡禪屋空江瑟瑟縈霜蔭  
濕磴層層阻雲木晴風何日颺茶烟策杖相求慰幽獨  
紅蕖引用李長吉體

紅蕖羅襪艷長江  
苔錢翠膩弓鞋幫  
邯鄲步弱西陵遠  
螭蛾欲飛玄的雙  
妙髮雲盤巫螺淺  
垂柳梳花剪剪  
魚尾霞烘外色天  
紫磨金輪月夕圓  
衍波遙遞綃宮牋  
素女多情愁牌絃

櫟括劉緩李巨仁及古鏡銘語

君家寶鏡何年世  
土花苔葉新開翳  
茱萸匣掩鴈鴒斑  
珊瑚臺掛蟾蜍窠  
臺是軒轅鏡姓溫  
背後銘文宜子孫  
海氣空濛若圓燈  
勾闌匝匝似城門  
雄鳳雌凰本自雙

左龍右虎順陰陽  
繡戶無波菱自動  
紗窓不夜月恒光  
上有仙人不知老  
渴飲玉泉饑食棗  
嫦娥休上廣寒宮  
偓佺同住蓬萊島

為唐池南題秋江遠眺圖

秋空沈寥秋影濶  
魚尾霞收雲一抹  
千崖有靄風落山  
萬壑無聲水歸末  
杈枒老木擎虬龍  
慘澹平林叫鷓鴣  
不聞金籟似竽鳴  
但見翠微如黛潑  
窄堵僧睇迥不昏  
略約樵行危易怛  
一彎赤燒楓人明  
萬螢黃雲稻孫割

尋穴玄駒迷東西卜樹烏鴉相叫聒詞客頻將技癢搔  
畫工欲把天機奪老倦捫蘿與攀葛倚闌獨把吟髭捋  
遙岑寸碧天杵倚遠目雙明海月掇開樽披圖興不淺  
烏絲欄界玄霜沫為君走筆賦新詩却笑蕭郎擊銅鉢  
賦得千山紅樹圖送楊茂之

蕭郎雅工金碧畫愛畫碧雞與金馬畫作千山紅樹圖  
行色秋光兩瀟灑搖落深知宋玉悲登山臨水送將歸  
丹林初曉清霜重紫谷斜陽赤燒微故人辭我故鄉去

滇樹遙遙接巴樹桑落他山共醉時  
楓香客路銷魂處  
白首遐荒老未還  
流波落木慘離顏  
錦城紅溼那能見  
千里隨君夢裏攀

後神樓曲有序

司空南坦劉公

元瑞

慕陶貞白茅山樓居足不履

地之事而未構樓也待詔文衡山為繪樓居圖俾

神栖焉射陂朱子

日落

作神樓曲余彙括其意為

後神樓曲

安期昔製神樓散射陂今作神樓曲神樓主人南坦翁  
欲往從之限空谷吾聞仙家五城十二樓樊桐方丈繞  
瀛州長風引舟不可到環中根像空神遊坦翁元是神  
仙流何年飄然下丹丘天庭摘藻挾鸞鶴雲輶立仗鳴  
華騶北斗南宮不肯住掛冠歸來營菟裘碧瀾卷盡開  
茗雪紫烟縈帶彩雲夾新波菱榜泛青翰過雨蘋風爽  
烏恰人間九戩播聲詩天上五龍傳睡法青李遙看尺  
牘來雀羅淨掃昏眸開尻輪神馬馳萬里坐我赤明龍



漢臺一氣孔神存中夜手翳華芝海若詫中有真人巾  
金巾授以靈文老復姤玄珠纍纍蒼玉鳴烽沉析聞歌  
太平豐屋天翔鬼瞰室廟謨何用談佳兵遊仙夢覺聞  
清嘯載賡清潤連清調願從廣成順下風肯許襄童窺  
末照咸池濛汜紛如馳扶起混沌須神鑒他年合遇神  
樓散約公海上尋安期

高縣義士行

山都水都壘寨連九絲之城如絲牽鴉飛不到山勢惡

簞蓐剡戟生愁烟沿村殺兒將女去黃雞白犬不得眠  
主兵不救城郭遠含冤茹苦徒呼天高縣義士譚金錢  
鳴儔嘯侶排戈鋌衆寡不敵吁可憫捐軀舍生遭竇顛  
至今里社傳靈異表厥坊宅榮陌阡何當尸祝慰毅魄  
以配九歌國殤篇我今感作義士行他年貞石堪銘鐫

普市

孤城比屋雪封瓦重露濃嵐霽四野飄颻風凹巧回鳶  
凝涸冰槽工溜馬倦客落日投主人冷突無烟炊濕薪

敢辭白首禦魑魅眼見木夫尤苦辛

赤虺河行

君不見赤虺河源出芒部虎豹之林猿猱路層水深雪  
不可通千尋建木撐寒空明堂大厦採梁棟工師估客  
穿蒙龍此水奔流似飛箭縛筏乘桴下蜀甸黯淡灩澦  
險倍過海洋流沙爭一線誰驅烏鵲役鼃鼃秋濤夏潦  
息盤渦栢亭雲屏濟川手奠民枕席休干戈安得脩為  
夷唐道鐫刻靈陶垂不磨

赤虺河即唐武后世征雲南  
檄文所云赤虺河也虺呼為

水音相  
近爾

寄題陳海樵息柯亭

海樵仙人居海濱，倭侏羨門為主賓。  
一口汲盡東海水，海底珊瑚樵作薪。  
邇來又逐雲中侶，鱗宮貝屋難留住。  
六月一息逍遙遊，斧柯掛在珊瑚樹。

與劉虛湖醉對白石畫舫亭

七十二年老遷客，騎馬復走滇雲陌。  
二妙風流絕代無，談笑渾忘窮海謫。  
畫舫亭前花正開，佛桑含笑粉紅腮。

畫圖更愛韓熙載一幅嬋娟進一杯

華燈引琴思漢調

燭龍潛耀顧兔微金缸委照玄夜暉  
蘭鵲吐焰芙蓉葢  
熒熒火齊歎煙璣九枝絢爛虹九圍  
丹鯨樹鬐蟠彩翬  
長明掃暈蛾停飛啼鳥聲緯璫瓏扉東山戎旅吟伊威  
鳴梧高張黼低帷背壁抱影鼓思歸  
星翻漢回海漏稀

題扇贈張愈光

張子扇頭水墨痕畫我讀書秋樹根  
天涯對此各感慨

我未成歸子苦奔空谷白駒形影瘦南山玄豹風塵昏  
孔明廟前老栢樹商聲激越歌無句門外僕夫引西路  
點蒼磷磷莽回互

辛卯除夕飲潘郎金斗歌

主人新得黃金斗好客尊前為余壽招搖揭柄轉春星  
沆瀣騰波挹仙酒天涯今夕歲云徂痛飲狂歌夜良久  
乍可用爾為鷗夷萬事盡付持杯手君不見商彝周鼎  
徒聞名見之不識人不取

謝周健夫惠易治劍歌

仙翁劍客元同流，昆吾歐冶誰能儔。  
鑄成寶刀戛琳瑯，蛟龍宛轉盤斗牛。  
上有款識燦銀鈎，隱隱起如雲色浮。  
天吳俛首黔羸愁，白日犀塵不敢留。  
却鼠鳴鴻赧然羞，使君得此自玄州。  
太行剛風鷹隼秋，何物妖魅干天囚。  
一揮可當萬貔貅，歸神日母抱地喉。  
霜稜霞燄夜不幽，獨騎赤驃馬棗騮。  
身披昂藏日本裘，上黨霧宇塞蜺幇。  
星沙月蝟輝滄洲，天門信信虎豹彪。  
瑤臺佚女之蹇脩。

歸來菌閣與蕙樓水擬方壺山擬緱吹簫一吹喚莊周  
生平不能作蒯謳乍可公孫舞纏頭蓬髮濡墨驚潛蚪  
雲岑仙人意氣投解后贈我千金訓沉烽靜柝無國仇  
含光承影將何求夸娥巨靈機已休洞庭君山如苔漚  
他時相携負嶠遊

禹碑歌

禹碑在衡山絕頂韓文公詩云岿嶁山尖神禹碑  
字青石赤形模奇科斗拳身薤倒披鸞漂鳳泊擎



虎竄事嚴跡闕鬼莫窺道士獨上偶見之我來咨  
嗟涕連洒千搜萬索何處有森森綠樹猿猱悲詳  
詩語始終公蓋至其地矣未見其碑也所謂青字  
赤石之形模科斗鸞鳳之點畫述道士口語耳若  
見之矣發揮稱贊豈在石鼓下哉迨宋朱張同遊  
南岳訪求復不獲後晦翁著韓文考異遂謂衡山  
實無此碑反以韓詩為傳聞之誤云再考六一集  
古錄趙明誠金石錄鄭漁仲金石略之三家者古


刻畧列無遺獨不見所謂禹碑者則自昔好古名  
流得見是刻亦罕矣碧泉張子得墨本於楚持以  
貺予予撫卷而歎曰嗟乎韓公所謂事嚴跡闕者  
信夫不然何三千餘年而完整無泐如此何昔之  
悔何今之顯悔者何或翳之顯者何或啟之天壽  
珍物神飫吾嗜不必以生世太晚為恨也已作禹  
碑歌以紀之

神禹碑在岫嶠尖祝融之峯凌朱炎龍畫傍分結構古

縹書遍刻戈鋒鉅萬八千丈不可上仙局靈鑰幽以潛  
昌黎南遷曾一過紛披芙蓉塞水簾天柱夜瞰星辰下  
雲堂朝見陽輝遲追尋夏載赤石峻封埋古刻蒼苔黏  
拳科倒薤形已近驚漂鳳泊辭何纖墨本流傳世應罕  
青字名狀人空瞻永叔明誠及夾漈集古金石窮該兼  
矚列箴銘暨款識橫陳軒牕和奎鬻胡為至寶反棄置  
摺摺磨蟻捐烏蟾又聞朱張遊岳麓霽雪天風影佩褱  
搜奇索祕跡欲徧春倡撞和詩無厭七日崎嶇信有覲

一字膏馥寧忘拈非關峭嶮阻登陟定是藤葛籠窺覘  
好古子生嗟太晚拜嘉君貺情深忼老眼增明若發覆  
尺喙禁斷如施箝七十七字拏矯虎三千餘歲叢蛇蚺  
憶昔乾坤漏息壤蕩析蒸庶依苓慘帝嗟懷襄咨文命  
卿佐涿洞分憂悞洲并渚混沒營窟鳥跡獸迹交門簷  
竭來南雲又北夢直磬西被仍東漸黃熊三足變紆服  
白狐九尾歌麗柙後乘包湖受玉籙前列溫洛呈疇臚  
永奔竄舞那辭胼平成天地猶垂謙華嶽泰衡祇鎮定

鬱塞昏徒逃，喁文章絢爛懸。日月風雷呵，護環屏黔。  
君不見周原石鼓半已泐，秦湫楚詛全皆殲。此碑雖存，  
豈易得，障有嵐靄峯巖從音夏絕柱藜藿弔影颯瑟。  
森櫛栴相娥遺佩冷斑竹山鬼結旗零翠嶽造物精英。  
忘洩露祇恐羽化難留淹欲摹拓本鐫崖壁要使好事  
傳緗縑著書重訂琳瑯譜裝帖新耀瓊瑤籤麝煤輕翰。  
蟬翅榻煩君再寄西飛鷁。



升菴集卷二十四

欽定四庫全書

集部  
升菴集卷二十八

詳校官編修臣錢樾

中書臣劉源溥覆勘

總校官原任中允臣王燕緒

校對官學正臣李巖

謄錄監生臣蔣繼勳

欽定四庫全書

升菴集卷二十五

明 楊慎 撰

七言古詩

南枝曲

會川五里坡羅羅哨邊有古梅一株婆婆蔭映形  
如曲蓋封蘚斑駁文如篆籀蓋數百年物也予平  
生所見梅樹此為冠絕惜乎生於窮山絕域而不  
得高人韵士之賞也玩歎之餘作此曲焉



我渡烟江來瘴國毒草嵐叢愁箬黑忽見新梅繁路傍  
幽秀古艷空林色絕世獨立誰相憐解鞍藉草坐梅邊  
芬蓋香韵風能遞綽約仙姿月與傳根地錦苔迷蟻縫  
樹杪黃昏搖鳥夢飄英點綴似留人顧影徘徊若相送  
焦桐椽竹亦何心中郎一見兩知音誰謂南枝無北道  
願譜金徽播玉琴

水峽驛觀瀑布泉行

水峽羣山日月昏飛泉百道接江門猶龍近逐晴虹掛

似馬遙看疋練奔懸紳瀑布屏風疊硃崖轉石青天折

三千尺下直難量十二崿流承不絕

見水經註

煙竈霧捲滴

珠槽霑爭嵐沉冷玉膏莊周虛說黿梁險枚叟空誇鷺

磧濤一從流戍辭巴蜀幾迴于役行荒服百丈頻經水

峽牽孤燈慣向江門宿纖蘿不動月明天彷彿桃源擬

問仙滄溟有氣張圓橙銀漢無聲瀉直弦山水清輝如

可樂已覺蟠胸飽丘壑乘興聊賡太白篇知音莫笑徐

凝惡

九厓草堂歌為督學余公賦

君不見九江之地匡廬山山人匡俗廬其間往時曾讀  
支曇賦夢想神遊不可攀又不見東林梵宇金銀寺蓮  
社松門清且麗陶劉宗雷有遺跡錦苔不識遠公記奇  
甸靈區迴異常傍行敷落那能當生賢下瑞在英俊物  
華天寶呈文章潯陽曾寓李太白芙蓉峯前寄行宅春  
金戛玉詩百篇九江秀色可攬結九厓先生儒之英含  
章秀發元氣精錦心萬卷汲脩綆霜蹄千里邁遙程竭

來邇近滇之麓訪我迴谿與深谷往年曾枉瓊瑤書什  
襲珍藏斯夕讀暇日示我草堂圖平林窈窕還崎嶇知  
公袖中有東海藻鏡流洪九派紆巖廊登拜在朝夕肯  
放鴻罾許龍蟄銷菟脰金馬門日望東南遠山碧

贈張生一鵬歸涪江并柬太宰松泉夏公

嘉君新自涪州至袖有松泉經歲字江潭憔悴采離騷  
丘壑風流閒啟事西窓剪燭話巴山空谷足音一解顏  
何日陶潛三徑就追隨范蠡五湖間

宿金沙江

往年曾向嘉陵宿，驛樓東畔闌干曲。  
江聲徹夜攪離愁，月色中天照幽獨。  
豈意飄零瘴海頭，嘉陵回首轉悠悠。  
江聲月色那堪說，腸斷金沙萬里樓。

寶慶相

詠史彌遠也。楊鐵崖有此篇，余讀之恨其深文隱語不足，以誅姦諛，且捨彌遠而傍罪余。天錫梁成大與趙葵諺所謂無奈冬瓜何，捉著瓠子磨也。重

賦此首

寶慶相臣大商賈不販海貨販宋主晝化飛燕啄皇孫

夜駕老蟾嬪月母

彌遠表裡楊后遂有三思之寵有作樂府詠雲以譏之云往來與月為儔

舒卷和天也蔽

四十一年富且融格天偃月將無同老死牖下

猶未艾生冤歸來稱鬼雄君不見井研諫臣鄧若水一  
疏彈姦澹菴比拾星漏曦非良史續宋綱目者誰子

毛女引

雌龍架濤擎海鼎秦橋遠見扶桑翠徐福樓船去不還

江壁俄傳蒼水使椒煙蘭霧卷衣人化作烏騅一炬塵  
老龍鱗下毛衣女獨坐蓮峯閱幾秦

高峽曉發過滇

碧雞關頭月上霞高峽海色分人家  
菱塘眠柳猶藏鴉  
雙雙柔櫓聲啞啞船尾風輕浪不花  
轉盼已屆滇之涯

古歌寄盧思邵二首

我所思兮在石湖欲往從之無輕軀  
晨朝遠望盡平蕪  
美人贈我白象籤何以報之蒼玉鈿  
路遠莫致倚煩厭

何為懷憂心出潛

我所思兮在筆溪欲往從之無輕輶夙昔夢見烟水迷  
美人贈我文錦帶何以報之研光貝路遠莫致倚蕉萃  
何為懷憂心惋憤

送周世寧進士歸楚

周郎同榜復同庚瓊樹風流四座傾薇省爭傳八義賦  
杏園都重數車聲鳴珮曉隨鵷鷺筵望雲春隔鳳皇城  
素衣應染緇塵久燕鴈荆鴻幾回首秋後蕭林轉北風



煙中五兩隨南斗東南今已靜風塵舵鼓漁燈夜問津  
楓林日出明丹葉瓜步潮來沒白蘋銅堤折柳驚霜早  
赤壁吹簫見月新艤舟停榜鄖西沚展愛高堂承燕喜  
梅花索笑侍斑衣椒酒揚芳稱玉匝少年何事獨遲回  
枕藉離騷紉蘭芷相思早訂相見期勿使佳人娟娟隔  
湘水

冬晴三章寄彭幸菴

冬晴連月歲欲闌北陸脩景迴南巒行人喜舞農人歡

負來杖策各自返過涉不愁溪水寒

岷山白日多光輝清江微霧雪霰稀魚龍不蟄鴻鴈飛  
塞上將軍未解甲城南思婦夜縫衣

岸梅春動江不波玉顏粲粲回缺柯瑯洲霜晚繁香多  
吁嗟二物堪贈遠如此迢遞關山何

香霧髓歌

余得巨柑於江陽形如北方瓶梨不忍食之携至  
榮昌清夜與冷漢池夜話漢池不飲乃出是柑剖

之味亦異恒品漢池曰昔廖明略晚登坡門飲以  
蜜雲龍飲茗遂為嘉話珂也晚登公門此亦公之  
蜜雲龍也請以坡詩香霧喫人及陸天隨星髓未  
彫之句合而名之曰香霧髓仍出驚硯棗心筆屬  
予作此歌云

君不見東坡先生蜜雲龍緘藏遠自朝雲峯宛丘淮海  
四學士分江貯月初啟封又不見升菴老人香霧髓獅  
頭瑞柑萍實比香霧喫人星髓開錫以嘉名漢池始龍

團獅柑各有神江陽玉局共稱珍若把西湖比西子從  
來佳茗似佳人君才十倍廖明畧姑射風姿昆玉脚蘭  
舟菱唱朝陽詩閒情止酒淵明作黑頭醪飯早歸來枕  
谷棲丘步紫苔王陽迴車九折坂楚筵辭醴三休臺玄  
言疊疊懷坡老清夜沉沉同絕倒燭淚融成兩鳳凰仙  
蹤迴寄三青鳥酒酣邀我賦短歌楚頌亭前芳思多像  
置伯夷真不翅才盡江淹其奈何

觀汝南王玉磬碑引

汝南帝子真人冰壺玉樹凌風塵心源早契空門地  
意象遠寄荒岑瀕步折峯頭翠肌草直登萬頃層霞杪  
金鞭九馬蒼煙叢霓旌千騎紅雲島伐石何人得磬襄  
豐碑擊作聲琳瑯鳳凰毛羽落丹穴蛟龍文采蟠銀潢  
山圖郡乘收難采波瀾東逝星辰改眼見雙林成古丘  
誰問君王仙跡留可憐南浦西山外猶有鳴鸞歌舞樓

芳蘭引

霸薰香草名見范子計然胡絕亦香草  
見楚辭

廣莫風中小歲春百昌未吐蘭芽新柔芸都荔元同節

園柳宮梅且後塵南國美人東家子若英華彩苕榮比  
蕙樓茵閣起江邊綠葉紫莖羅戶裡崇佩朝充翡翠囊  
溫湯夜浴鴛鴦水博山爐中百和香虎蒲龍棗及都梁  
流雪迴風縈洛葛橫煙斜霧裊秦芳曾聞有酒布蘭生  
復有雅曲倚蘭名願分明燭徐吾影來媚國香燕姑情

升菴集卷二十五

欽定四庫全書

升菴集卷二十六

明 楊慎 撰

七言律詩

僧鞋菊和顧箬溪韵

獅子床頭旦過鞦多羅樹下覺花開  
西風有脚垂垂發  
東度無媒得得來  
挹露祇宜香界見  
行雲休入畫堂猜  
石湖舊譜難收盡  
箬社新詩取次裁

詠荔枝



萍實楚江浮赤日桃花秦洞紫紅霞試將海內芳蕤數  
敢並江陽荔子誇雲液留香凝重錦冰丸映肉捲輕紗  
美人釵股雙雙綴肯擲潘郎滿鈿車

夏雨不絕東張蜀望

張名我

南滇六月朱夏涼疊疊雲嵐浮曉光林花含笑遠天靜  
江草喚愁終日長闌風伏雨淹客路回谷深谿非我鄉  
城隅隔手不相見車馬經過淋潦妨

王褒金馬碧雞頌  
回谷深谿非上之

鄉

寄徐用先程以道

徐名文華

程名啓充

軒轅臺畔雪霜寒陰磧茫茫萬里寬  
夢繞盧龍明月易書隨鴻鴈朔風難  
天涯好在崔亭伯海上終還管幼安  
應念瘴鄉孤戍者自將形影弔衰殘

庚寅除夕王子推送桑落酒適傳希說葉道亨

同過守歲卽事

桑落舊方傳陸海椒花新頌及滇春  
能消客底千金夜頓有天涯兩玉人  
無家垂老同漂梗痛飲狂歌非隱淪

歲去年來真反手柳青頭白轉傷神

鄧川楊少叅兩依莊

楊名南金

名公妙年辭京華飄然歸來乘雲槎天上烏啼御史府  
海邊龍卧神仙家東山老子興不盡南華真人生有涯  
空餘蟠胸濟世策日對隣叟談桑麻

泛浪穹海子

峯頭才見一泓幽沙尾驚看四岸浮沅水羅文堪並色  
嘉陵石黛迴添愁秦源欲問桃花渡楚望渾迷杜若州

亦有滄浪舊歌曲晚來乘興更扁舟

帝釋山

帝釋山頭雲滿谿東菴飛雨西菴泥碧潭照眼石鯨動  
翠微當面林鷺啼濛濛香霧花層溼漠漠生煙樹點齊  
傍險銀鞍應未怯玉壺清酒為君携

毛希曾園千葉梅

毛名沂

今年朔氣凌炎暉雪後見梅千葉稀空谷倚竹翠袖薄  
洞戶穿燈香霧微嬋娟莫待月初賞綽約即愁風乍飛

繁霜旅鬢不羞汝爛醉賓筵簪朶歸

臘朔後再向毛園醉梅

東閣早梅春已破南枝初月夜不遲羅浮仙人再入夢  
揚州何郎仍賦詩留連錦席坐雲暖瀟灑玉樹臨風歌  
嫣然正用啟繁齒颺爾無勞嗟鬢絲

春興 八首

遙岑樓上俯晴川萬里登臨絕塞邊碣石東浮三絳色  
秀峯西合點蒼煙天涯遊子懸雙淚海畔孤臣謫九年

虛擬短衣隨李廣漢家無事勒燕然

又

昆明初日五華臺草長鶯啼花亂開探禹穴遊今已遂  
弔湘纍賦未須哀巢雲獨鶴時時下傍水羣鷗日日來  
散地幸容高枕卧清朝豈乏濟川才

又

諸葛提兵大渡津河流禹鑿迴如新彩雲城郭那無跡  
黑水波濤亦有神象馬遠來銅柱貢犬羊不動鍊橋塵

靈闕在眼平於掌歲歲蒲桃苜蓿春

又

憶昔衣冠侍帝庭常陪鵷侶翦仙冥張騫銀漢通牛斗  
方朔金門隱歲星鵲鸛吟詩宮月白鳳凰傳詔御煙青  
夢回髣髴鈞天奏腸斷蕭條海角亭

又

帝里朝辭供奉班客程宵濟洞庭灣湘靈鼓瑟清泠外  
蛟女鳴機縹緲間青草波光連夢澤蒼梧雲物闢疑山

故園亦有岷江水垂老生涯釣艇閒

又

平沙落日大荒西獨立蒼茫意轉迷  
蕙畹蘭皋愁晚對竹垣花掖記春棲  
摧頽杜甫歌朱鳳憔悴王褒望碧雞  
白首艱難隨去住青雲容易墜攀躋

又

白屋茅堂枕碧沙玄亭亦近子雲家  
浣花溪上花饒笑濯錦江中錦勝霞  
遊女秉芳歌窈窕狂夫題竹醉橫斜



悲來瘴海凋霜鬢愁聽山樓咽暮笳

又

天上風雲此際多山中日月竟如何爭傳鳴鳳巢阿閣  
又見飛鴻出爵羅宣室鬼神思賈誼中原將帥用廉頗  
難教遲暮從招隱擬把生涯學醉歌

謁二忠祠

學士文章懸日月尚書劔履上星辰九原松柏香臺夜  
雙廟莓苔影坐春山鬼嘯歌寒薜荔海童奔走薦芳蘋

經過此地同揮淚況是江潭放逐臣

喜周木涇工部復至滇

吳門滇徼兩心期河艸江梅一歲時  
朗月肯教玄度共碧雲知為惠休移  
好音起夜忘衰病喜氣先春迴暖姿  
華頂溫泉俱舊約似留仙賞待新詩

看花出郊村店小飲

異國平居野興深花邊立馬此登臨  
雲林未許成歸隱塵世惟思學醉吟  
若下風流新蟻綠長安春色舊貂金

芳菲遲爾來何暮葉底流鶯正好音

寄文徵仲兼問訊姜夢賓

翰林供奉白頭時洗墨歸尋古劍池近得王家湖水帖  
遙傳謝氏敬亭詩扇頭雲樹搖山翠障子烟花動海漪  
頻過時川草堂否三游空結夢中期

賦得百花潭送人之楚

滄浪潭水照潭花無賴家家惱杜家不數潘安河內縣  
堪留衛玠洛陽車晴煙翡翠蘭苔溼涼雨鴛鴦荇藻斜

五兩行穿巴峽樹百壺先泛楚江槎

廣都舟中寄謝狷齋

江波錦落寒潭清彩舟曉發芙蓉城中流帆影虹蜺卧  
夾岸櫓聲鶯鶯鳴越裳白雉已入貢荒服碧雞猶遠征  
祇憑一札隔歲遞未知雙劍何時并

思公子篇

三五二八艷嫦娥百萬十千酬笑歌羅帳浮雲開玉葉  
鏡臺明月湛金波鬪雞曉向侯家出走馬宵從主第過

絕漠蘇卿竟誰問長沙賈傳奈君何

南溪舟中與劉承之話舊

晴江初月對佳人明燭深林慰苦辛  
征棹來帆成白首鳴騶肅侶憶青春  
萬里關塞浮雲外咫尺滄浪積水濱  
歌罷語闌還別去朔風寒雪倍傷神

泛舟浣花東阜猶齋同賦

風簷水檻含清暉月閨夏五暑氣微  
山中薜荔幽人帶池上芰荷遊子衣  
雙魚六馬慣識曲青蛉白鷗皆忘機

揚雄玄閣不寂寞杜甫草堂天下稀

贈永寧白參戎

貴竹新疆古蘭州分弓上將擁貔貅笙歌城郭天無夜  
耒耜郊原歲有秋界首江清春洗馬海漫山翠晚當樓  
銳頭勲業君家事四十登壇早拜侯

太華寺席上文似山詠郭舟屋名文湖勢欲浮

雙塔去山形如擁五華來之句愛其善狀景  
物而惜其全篇未稱也屬余易其首尾

仙人掌上梵王臺  
雨霽秋清望眼開  
湖勢欲浮雙塔去  
山形如擁五華來  
摩天鶴鶴窺明鏡  
呬浪魚龍引渡杯  
金碧西南無此景  
為君扶病一徘徊

寄張風泉侍御

名渙定州人

貴陽天馬遠行空  
元是蘭臺鮑氏驄  
未奉談犀恒北望  
忽傳書鯉到南中  
龍筋舊識文成麗  
蟬爪爭看定武工  
誰道停雲形影隔  
戍樓明月夢魂通

題楊補之梅

逃禪老人揚補之南昌新籍西川移寂寞真稱子雲裔  
清夷不為秦檜縋前身應是孤竹子後世但識梅花師  
風霜搖落千林兀玉蕊瓊蕤何太奇

補之子雲之後  
字从才不从木

寄袁子變

名恒

半豹才名真自許元龍豪氣更誰降堂前劍客呈鷗九  
屏後琴姬擁鳳雙貰酒十千傾玉瀝呼盧百萬倒銀缸  
舉頭望月沉珠浦攜手何時濯錦江

以忠州雲根筆贈韓旻菴



射虎當年舊將家  
騰將筆陣綰龍蛇  
停雲閣上紅塵隔  
題竹林中翠袖斜  
燕寢清香盤紫霧  
鼠鬚玄點竄青霞  
幾行循墨千衝折  
何必班超萬里沙

嘉州江上邂逅李端峯天使即事

皇華原隰素絲行  
仙里庭闈綵服明  
家慶國哀同盡節  
望雲就日總含情  
留連結桂橈相倚  
邂逅班荆蓋共傾  
抱病江天淹戍客  
煩君傳語碧雞城

送曹侍御時信

成旅候明辭禁掖揚舲千里下蓬萊東坡渺杳通南國  
瓊樹風流映栢臺句曲天邊鄉信近石頭城畔暮潮回  
遙憐避馬棲烏地好稱郎潛吏隱才

至前二日朝天宮習儀

緋袍玉珮過長安紫府珠庭引百官一代威儀非漢苑  
三成氣象是周壇城頭暝色籠輕霧樹杪新陽破早寒  
聞道宮衣添一線恩光請向袞龍看

升菴集卷二十六